

Sr. Edgard Meinhardt:

"Nos abogadonan a recomenda Aruba pa bira e sede legal di Proyecto Bolivar"



ORANJESTAD (AAN) -- Sr. Edgard Meinhardt, presidente di e "Proyecto Bolivar" y productor di e pelicula "Bolivar The Liberator" a sostene un entrevista cu DIARIO, unda cu el a amplia riba dicho produccion.

Tocante kico e produccion monumental aki ta encera, Meinhardt a relata lo siguiente: "E produccion aki a worde parti den varios etapa, y obviamente esaki ta un fase di desaroyo cu a conclui dia 8 di juli ultimo.

Awor aki nos a cuminsa cu e etapa di pre-produccion, den cual ta worde evalua tur e locacionnan y unda tur aspecto di e guion ta ser refina pa nan worde adapta na e location y lugarnan cu nos a bishita y caminda nos ta bay filma finalmente.

Ta sigui e etapa di produccion cu ta caba otro aña cu ta e filmacion riba su mes di e pelicula".

Tambe e productor a splica cu e pelicula lo worde filma den e lugarnan original, ubica specialmente na Venezuela, Colombia, y tambe Curacao (unda e Libertador a biba den cas di su rumannan, cual ac-

tualmente ta un museo cu ta conserva tur cos intacto te awor).

E pelicula tambe lo presenta paisahenan di Aruba cu lo representa e area di Cariben en general.

Ta trata aki di un pelicula di 3 ora y mey, mas un miniserie pa television cu ta dura 12 ora (of 12 capitulo), pero cu ta bay den dos espacio diferente.

Meinhardt ta splica: "Obviamente e pelicula ta bay sali prome y despues di un aña y mey, mas of menos, lo transmiti e miniserie".

Manera e director Alan Bridges a splica nos, den e pelicula aki lo envolve di 150 pa 400 actor pa forma parti di e ehercito, mas e reparto protagonista cu ta rekeri di por lo menos 45 actor.

Pero ta ken lo hunga e papel di Simon Bolivar?

Meinhardt a bisa: "Ainda nos no a defini ta ken ta bay interpreta Simon Bolivar. Nos ta considerando varios nomber na e momentonan aki, y dentro di e opcionnan cu tin plan tea nos tin actornan di e caliber di Keanu Reeves, Johnny Depp, Andy Garcia

Robert Downey Jr, y Alec Baldwin, y tin mas cu ainda nos ta agregando na e lista".

INVERSION

Manera a worde splica den varios oportunidad, e produccion aki ta bay consumi un capital di 100 milyon dollar, di cual ya caba tin un bon suma financia.

"Di e 100 milyon dollar aki 60 milyon a worde financia caba pa accionistanan fundador, y 40 milyon a ser coloca a traves di Bolsa di Valor na Venezuela. E oferta publico ta bayendo 'viento en popa' y nos ta spera di por cere pa final di november ora nos lanza e proyecto na Merca".

ARUBA COMO SEDE LEGAL

Pakico a scoge Aruba como sede legal?

Segun Sr. Meinhardt a splica tin varios razon cu a motiva e team di produccion di pensa riba Aruba como e sede legal

di Proyecto Bolivar.

"Ademas di su cercania cu Venezuela, nos a scoge

Aruba door di recomendacion di nos abogadonan. Aruba ta ofrece un serie di proteccion ideal, e.o, di derechonan di autor cu ta hopi bon establece", el a acentua.

Mr. Hellen Lejuez y e Legislado Mavis Chem ta na encargo di e aspectonan legal di e pelicula.

PROMOCION DI E PROYECTO

Sr. Meinhardt a menciona cu indirectamente e pelicula ta siendo promovi na henter mundo, door di e medionan di prensa, pero actualmente e equipo di produccion ta trahando activamente na America Latina cu ta e area mas dificil pa ubica henter e locacionnan y wak for di e punto di bista logico kico mester pa por defini, prome cu tur cos, kico ta bay haci den e area aki. Riba potret Sr. Edgar Meinhardt den entrevista cu DIARIO.